

# 2 Sóni

## Ebeq sáhnsahwe ahtebé ehwehne.

Mah pahsíépéq Sóni áwíq íre kéhrara peh ahtebia kégá Sóniga aiq sehiranúwe íwíáhowe. Segá iwíáhome wene naruoyabé áhreú púana wenáwíq íre sehiranúwe. Mina únserah wega Sísa tagaríáh kée íwíáhéna omaq atéh ínínseq wene animárínseqsábé pabeqme ehwéhne sehiranúwe. Áhnte ahtébiá kégá mira íwíáhowe. Ite íre tagarione. Páhsi sehiranú aninká mahraréna, Mó keyábé irutaboירו. Péhe éhwéh tei teino kégá Sísa Karáhé wehukení úkue tumíonsabe íre aiq pútare atáhwe. Mi kewé Sísa Karáhéne naruo woe ue sehiranúwe.

---

## Sóniga ákáhpi sehiranú pahsíc.

<sup>1</sup>Manikánka omaq atéh ínínseq arene animárínseqsábé íné Sóni aboawah wehéna teiúge. Itega aiq pútaq sansá sehgiónsábé itensabé nirutaboירוge. Íre ínébataq ínégá peh ómi aiq pútaq ehwéh sehgió kéreqka itensabé irutaboירוne. <sup>2</sup>Aiq pútaq ehwéh itene irupipeq kagaéna ahriahri mitaq kagai puaq itensabé irutaboירוne. <sup>3</sup>Maniká Iteriboreq wenahni Sísa Karáhéreqka ite séhréh aitera sirutaboیرaitera iru ukiq itehye. Segá aiq pútaq sansánéra itensabé sirutaboیرaitehye.

## Mó keyábé irutaboیرé sansa kawerue sehgióro i ehwéhne.

<sup>4</sup>Itene animári aiq pútaq ehwéh sehgiónsábé iwíáh íwíáhuge. Segá Maniká Iteriboga sehgióro ú ehweh aiq íráhwe. <sup>5</sup>Ínéga teiú éhwéhmé kawerue íráhro. Íre o sehgióro i ehwéh sehiranue teiúge. Mah ehwéhmé itega téh aiq írátó ehwéhne. Wensabé wensabé arutaboیرatého ro éhwéh teiúge. <sup>6</sup>Irutaboیرé sansamé mahraue kéhre. Manikáne sansá sehgióro ire. Wega sehgióro ú ehweh téh írátówe. Mi ehwéhmé mahraréna, Irutaboیرé sansa kawerue sehgióro ire.

## Sísa Karáhéne ehwehme ambubu atawéq sehgióneheqmúne i ehwéhne.

<sup>7</sup>Áhnte péhe éhwéh irare ke mah marákóipéq míáhwe. Segá Sísa Karáhé wehukení úkue tumíonsabe íre aiq pútare atáhwe. Mina tahnsa kéwé péhe íwíáh aitahráho ke méra sewe Sísa Karáhéne naruo woe.

<sup>8</sup>Itega kaweq arámbéhríuronsabé ápeq tabanagínehboq kawerurero. Itene ápeq moke meyangéhboq kaweroro.

<sup>9</sup>Sísa Karáhéne ehweh suena mó ehwéh sehgí ánimé Maniká moq aiq áúwéhre. Sísa Karáhéne ehweh ambubu atawéna sehgí ánimé Manikánseq wenahninseqka wereq mía míaóye. <sup>10</sup>Íre Sísa Karáhéne ehweh peh mó ehwéh íwáhnori anínká iteba sínaraq we mehweh atého. Itene nahupeq móátéhboq peh áwérakahro. <sup>11</sup>Péhe éhwéh íwáhnori aní mehweh atéh ánínká wene ahbabáq sansa séhréh atéhre.

**Sóniga mi ke koragéyabe awahbeh ehwéhne.**

<sup>12</sup>Íné áhnte mó ehwéh kéhranawe amahnága pépahqtaq sehiranáyabe nuwahriehre. Iteba koragéyabe nuwahbehre. Iteba konaraq itereq moraráq ehwehnéq mi tanáhráq iwíáh íwíáhonehe. <sup>13</sup>Manikánka omaq atéh íní arenanahnone animárínká itensabé iroero ewe.